

四庫全書

集部

欽定四庫全書

御定歷代賦彙卷二十九

地理

新潭賦

唐王泠然

國之天府名曰河南水有清洛漲乎新潭夫其貫都成
川習坎為德石門呀豁而洞瀉綠樹逶迤而夾植源自
山來漕因人力或清淺而見底或深沉而莫測奔狹口
以雷聲積中心而黛色若乃方將暮春大集都人錦筵

橫石羅幕藉塵騎影攢臨變作桃花之浪衣香亂入翻
為蓮葉之津由其地勢多美所以潭名永新觀其城闕
映帶閭閻縈繞半向石崇之園斜經潘岳之沼星月沉
浮乎其內煙雲洗拂乎其表不生芰荷但聚魚鳥通舳
艫之利於國既多開浸灌之功與人非少自記從調恒
來此遊朝林坐而疑夕夏潭行而覺秋清可照人實欣
逢於朗鏡虛宜受物佇相引於仙舟帶洛常恥臨淄更
羞况獲泰乎餘派終敢希乎下流

新潭賦

唐張環

惟國之左當河之南分逶迤之舊洛漲浩漾之新潭觀
其沙石中映魚龍內涵泛危槎而獨隱紛衆水以相參
原夫引派潛迴疏源洞出淙石門以雷注透金塘而箭
疾暝浮天漢之雲晝洗嵎夷之日雖習坎之為常乃流
謙而不溢若夫正月登晦韶風報春花明上巳柳暗長
津出金埒而遊騎下瓊樓之美人愛清流之疊疊走香
駕以鱗鱗樂此幽勝契乎陽濱竭主第之羅幕盡侯家

之錦茵窺浴鳥之呼伴見飛魚之觸綸既靈長於上國
恒見美於斯辰若夫黛色冲融清光晶了綠苔一點疑
濯髮於江波青楊四周若連帷於漢沼湛珠彩於星夜
流鏡華於月曉苟形影之可觀乃妍蚩而必表歲蒼茫
兮寒氣冽潭皎潔兮生堅冰比玉卮而逾淨對瓊華而
更凝猶不若鏡室之為朗銓臺之可稱庶狂愚之可鑒
知簡要而相承

秋潭賦

以秋氣清爽資
彼澄澈為韻

唐

王起

汚彼積水凜乎高秋秋應律兮則勁水為潭兮至幽當
草木之不芳獨開翠色因天地之始肅更變寒流匪騷
人之詠歎實知者之娛遊爾其畜翕淪之色得蕭瑟之
氣就其淺則疊疊共清臨其深則兢兢足畏居下流之
可保信上善之為貴寂爾不動湛然恒平正衣冠而逾
審燭毫髮而必呈性則納汙能積小以成大時方收潦
故沿濁而更清鷗浪不振驚濤不驚同至人之虛受比
君子之持盈懿其歇昏霾羅物象峰巒之所攢列雲煙

之所來徃媚潛虬之幽姿疏遊人之煩想不汪汪於千
頃自冷冷於百丈寫星火於初流涵桂月兮始上湛清
華於古木於以交輝澄鮮彩於層空於焉競爽虛明莫
映皎鏡無私處不爭而成德體自然以為資金風乍搖
似易水蕭蕭之日木葉方落如洞庭嫋嫋之時映沆寥
之遠天動悠揚之短晷與碧落而相合將清光兮乍起
淨如練兮可名清濯纓兮增美儻朝於海知引徃而納
來如挈其餅可注茲而挹彼安彼皎潔利物含弘溢金

隄之晶晶窺銀礫而澄澄飛螢乍臨疑列宿之在漢纖
鱗或躍若迎春而上冰豈清淮之可翫何靈溪之是矜
則知沸潭無涌聞之於栗烈寒潭見底稱之於洞澈孰
若積玄流當素節金鏡同朗冰壺共潔既妍蚩而照臨
幸清通之區別

浯溪賦

宋 楊萬里

予自二妃祠之下故人亭之旁招招漁舟薄遊三湘風
與水其俱順未一瞬而百里歛兩峰之際天儼離立而

不倚其一怪怪奇奇蕭然若仙客之鑑清漪也其一蹇蹇諤諤毅然若忠臣之踏鼎鑊也怪而問焉乃浯溪也蓋唐亭峙其南岵臺歸其北上則危石對立而欲落下則清潭無底而正黑飛鳥過之不敢立迹予初勇於好奇乃疾趨而登之挽寒藤而垂足照衰容而下窺忽焉心動毛髮森豎乃跡故步還至水滸剝苔讀碑慷慨弔古倦而坐於釣磯之上喟然歎曰惟彼中唐國已膏肓匹馬北方僅獲不亡觀其一過不父日殺三庶其人紀

有不數矣夫曲江為篋中之羽雄狐為明堂之柱其邦
經有不蠹矣夫水蝗稅民之畝融豎推民之髓其夫人
之心有不去矣夫雖微祿兒唐獨不賈厥緒哉觀馬嵬
之威垂渙七萃之欲離殪尤物以說焉僅平達於巴西
吁不危哉嗟乎齊則失矣而楚亦未為得也靈武之履
九五何其亟也宜忠臣之痛心寄春秋之二三策也雖
然天下之事不易於處而不難於議也使夫謝奉冊於
高邑稟重吳於西帝違人欲以圖功犯衆怒而求濟天

下之士果肯欣然為明皇而致死哉蓋天厭不可以復
祈人潰不可以復支何哥舒之百萬不如李郭千百之
師推而論之事可知矣且士大夫之捐軀以從吾君之
子者亦欲附龍鳳而攀日月踐台斗而盟帶礪也一復
苙以耄荒則夫一呼萬旗者又安知其不掉臂也邪古
語有之披機之會間不容楮當是之時退則七廟之怒
諸進則百世之揚解嗟肅宗處此其實難為之九思而
未得其計也已而舟人告行秋日已晏太息登舟水駛

於箭回瞻兩峰江蒼茫而不見

漫塘賦

有序

宋 劉 宰

張瑞衡謂漫塘叟曰余昨宦東州客有問漫塘之景者
余無以應或又有徵圖於余者曰子漫塘里中人也寧
無之余又謝無有既歸將與好事者謀之而游乎塘之
上見景物之無奇游觀之無所難之可若何叟不對退
而援筆為之賦其辭曰

東沿柳巷北屈蔬畦小溝環其南通川漫其西靡種靡

藝不耨不治葭蘆茁而映帶成行沙土潰而壅底為堤
茶蓼叢生蒲稗因依菡萏紅白錯如布綦爛乎若吳陂
初按於彩陳粲兮若月宮更下於瑤池翠蓋亭亭芳氣
菲菲鶯慣圓沙之宿魚便密藻之依蛙蚓爭鳴而鼓吹
百萬鴛鴦來下而爛斑舞衣雲斷而霞散錦綺風平而
月漾玻瓈茲實天壤之真趣有非世俗之可知亦有新
齋臨乎水涯小橋斜徑矮屋疏籬雨未多而泥沒膝門
雖設而草侵扉朽木慣宰予之晝寢青苔驚玉川之夜

歸仙舟自去誰為元禮高軒不來孰為退之叟之言未
畢瑞衡曰止余聞李愿安盤谷之居杜老喜浣花之寓
彼豈玩志於物縱心逸豫蓋以厭俗喧卑脫身遐舉要
必有偉麗之觀幽閒之趣以澡雪其精神澄清其志慮
庶白日可到於羲皇而宵夢足通於帝所況如吾子內
絕意於聲色外忘懷於圭組為計已決歷年已屢而是
塘也廣深雖媿蘇夫子之滄浪而僻遠亦殊柳先生之
鉅澗其隘也可闢其闕也可補胡不增其高而為基夷

其平而為園畫舫浮深脩梁跨阻嘉花美木之列植真
館涼臺之接廡使鄰曲改觀兒童欣舞顧乃計失於因
循事仍於莽鹵豈惟無以自適於一時抑恐由之貽笑
於千古漫塘叟曰吁巢居知風穴處識雨顧吾與子雖
同聲氣尚殊出處子寧規吾以目前之苟且毋寧怵我
以方來之謗譽彼花迷金谷之園雪冷袁宏之渚淒涼
鈎瀨富哉鄙鵲試由今而視昔果孰去而孰取張子由
是俛然而思釋然而悟曰子無俟於索言吾特從而戲

汝

雲夢賦

元 何克明

駕洞庭之飛舲覽熊繹之故墟偉雲夢之鉅澤控天南
之一隅爾其雄跨大江延袤千里水滢滢其漸漬山龍
龍而迤靡却五嶺瘴煙而莫近豈五丈秋風之可擬草
木鬱其暢茂禽獸樂其游憩原田每每入獲耒耜之利
車馬鱗鱗歲閱蒐獮之備其產則橘柚青茅竹箭金錫
虎豹貔貅可以應庭實軍容之需麋鹿魚鼈可以為乾

豆賓庖之給實荊州之府庫亦中原之羽翼岳陽大別
擅名勝於古今夏口江陵分形勢於區域當其煙橫北
渚日暮蒼灣仙傳巨靈神游其間古琴鏗鏘寫幽怨於
湘女釣天縹緲奏廣樂於軒轅水天一色落霞孤鶩風
月雙清歸鶴啼猿岸沚汀蘭香溢靈均之離騷廣谷大
川地壯名虎之于蕃身歷茲土心馳徃古莫我名居實
維神禹當懷山襄陵之際任手胼足胝之苦及其雲土
而夢作乂於是考圖而貢可數暨夫荆懲之詩不歌而

楚氛之惡是怙于以田獵于以耀武何涼德之不長終
漢室之啓土有愚淮陰驕力跋扈致乘輿之鳴鑾烹良
犬於得免信乎地不足以設險德終然之可據天眷吾
皇奄有寰區雖茲澤之曠邈果見侈於雄圖嗟予忝於
楚產期觀光乎帝都極鋪張於雲夢恐徒儕於腐儒吞
八九於胸中曾不芥蒂請誦此語於相如志則未止於
駟馬高車尚無責之以上林子虛

雲夢賦

元
陳誼高

覽東南之巨浸兮渺乾坤其浮浮此未足以盡荆之為
數兮蹇將沂其源之流維九州之有澤兮羌荊州之雲
夢表二澤之橫亘兮跨江南北以相控原夫澤之為量
兮水既瀦而不溢匯衆流之交會兮自循道以秩秩若
宇宙之再造兮揭禹功於萬年俾五行之攸敘兮乃迄
今兮安其天吾乘流而櫟其側兮極空閒而深淵天莽
莽而不盡兮河藹藹而含煙亂風帆之往來通巴峽而
湘川綰青山之一髮兮結襄漢之衰延當春波之泛泛

兮捐四際於一區及寒濤之浸碧兮勢已殺而兩湖征
鴻飛而沒影兮涵元氣於冥無舞魚龍之夭矯兮雲垂
垂而水立映殘霞之錯落兮祝融蒼茫而欲晡原桑麻
之旆旆兮隰禾黍之離離岸蘭芷之菲菲兮芳洲繚其
江離緬懷楚子之遊田兮佩明月而冠切雲排千乘之
旌騎兮紛馳驟於水濱但知走獸之是獲兮豈得非熊
以致君漢高之偽遊兮未必臨幸乎此中笑齊封之雖
大兮終媿夫汨羅之孤忠塞天地於一浩兮居八九於

心胷洗往事之芥蒂兮乃北望夫清都睠雲夢於萬里
兮奠南服於一隅其藪澤之所聚兮皆材用之所需決
天下之疑兮有大龜之納錫用天下之武兮有弩楛之
勁直成天下之禮兮況菁茅之生植豈無秉心以東注
兮攄朝宗之萬一乃為之歌曰雲夢瀦兮流海土士楚
產兮貢天府秋風兮策策洞庭波兮恍萬舞俯伏兮端
門聽鈞天兮帝所

雲夢賦

元丘堂

繫東南之奧區維雲夢之二澤盪兩儀兮同開渺千里
兮莫極為上流之淵藪跨大江之南北吐霧雨兮吸煙
雲浮乾坤兮浴日月蓋其形勢汗漫風景蒼茫連淮通
蜀亘荆控揚并包漢沔縣絡沅湘漫漫荻葦之岸漠漠
菰蒲之鄉蔭煙林兮明滅浩雲水兮汪洋洲重洲兮掩
映浦隔浦兮相望鴻鴈鳬鶩之所集狐兔麋鹿之所藏
漁歌互答獵網成行樵牧彌野商賈連樯貨財之富聞
於四方至若羽毛齒革朽榦枯柏菁茅竹箭之由產黃

金丹砂之自出雖僻處於遐陬實有資於上國是故楚子之所常獵漢高之所欲遊長卿遠慕而特賦太白來觀而久留少陵詠洞庭之上杜牧吟澤南之州至今騷人墨客之來往必為之徘徊而賡酬諸生有翰林主人者曰昔子虛詫齊以雲夢之事而見辱於烏有先生今而賦之豈欲為雲夢解嘲也邪主人於是馮高眺遠攬今撫昔臨風俯仰喟然歎息曰嗟夫子以為今之雲夢猶昔之雲夢乎非也吾聞古往今來否極必泰世運既

回地氣亦改昔春秋之季世如麋爛而波潰彼區區之
齊楚各誇強而詫大惟田獵之是務惟原獸之是愛想
雲夢於此時為生靈之巨害方今聖皇御極天下為家
八紘一網四極一置游畋之事不動於念慮好生之德
周浹於邇遐遂使羽毛鱗介自飛自走而雲夢之魚鳥
如在文王之沼囿勾茅萌坼自生自育而雲夢之草木
如在陶唐之暘谷加以芟芟彌望麻黍陰翳悉令蒐獮
之場化為耕食之地是古之雲夢為民之病今之雲夢

為民之利也惜相如以俊逸之才不遇今太平之世雖知楚王雲夢之陋而反逢武皇上林之意况登高能賦可為大夫當宣雨露九天之澤為洗雲夢千古之污於是諸生欣然執翰操觚願鋪張今日之所遇起子虛烏有而告諸

田家坡賦

宋

孔武仲

登平岡以北望山石嶙嶙而青白非所謂兩鍾者邪遊氣濛濛以薄天非馮夷之所宮者邪洪濤巨浪號北風

者邪銀山玉城渺連空者邪余南歸而至此過鐘石之
旁畔三江會而為一兮浩聯屬乎天漢渺不可以儀舟
兮凜驚肅其魂幹鳴兩漿以橫絕兮寄宿夕於南岸舟
人相戒以不寐兮聽城鼓而宵半孤山岌其當前兮閃
羣星之燦燦及還吾鄉甫涉旬日昔之川行今則陸矣
昔之舟處今則屋矣欲輿而輿欲馬而馬入翱翔乎城
邑出馳驅乎垌野險阻危厲化為夷平蛟龍無所用其
威兮江豚白鱉安得以縱橫行持一筇疲卧一石而渴

飲一觥安得長此處兮差優游以養生塗於人之所不
涉兮耘於人之所不耕顧謂僕者此何處也對曰是名
田家坡去城十五里於時側日銜山松聲颼颼溪塘湛
其微波兮梅花落而飛浮方旋轉而返轡悵莫克以淹
留因援筆而成文聊以識乎茲遊

浮山堰賦

有序

宋 秦觀

梁武帝天監十三年用魏降人王足計欲以淮水灌壽
陽乃假太子右衛康絢節督卒二十萬作浮山堰於鍾

離而淮流湍駛漂疾將合復潰或曰淮有蛟龍喜乘風
雨壞岸其性惡鐵絢以為然乃引東西冶鐵器數千萬
斤益以薪石沉之猶踰年乃合堰袤九里水逆淮而上
所蒙被甚廣魏人患之果徙壽陽戍頓八公山餘民分
就岡壘未幾淮暴漲堰壞奔於海有聲如雷水之怪妖
蔽流而下死者數十萬人初鎮星犯天江而堰實退舍
而壞嗚呼異哉感而作浮山堰賦其辭曰

繫四瀆之並儷兮實脈絡於坤靈惟長淮之漫漫兮自

桐栢而發源貫江河以下驚兮拉泗沂而左奔走獍雷
以赴海兮駕扶搖而薄山固元氣之宣節兮熄衆兆之
災患粵蕭梁之服命兮抗北魏以爭衡信降虜之詭計
兮阻湯湯而倒征依兩崖以受土兮羌合節於中央捷
竹菑石之不足兮又沉鐵以厭不祥衰九里以中峙兮
截萬派之奔茫大隄屹乎如墉兮杞柳鬱其成行展源
深而支永兮雖暫否而必通倏凌越而奔潰兮與蒼蒼
而俱東若然犀之照渚兮旅百怪而爭道驕馬怒而嘯

蹠兮虎蛟冤而相糾哀死者之數萬兮孤魂逝其焉游
背自然以司鑿兮固神禹之所惡世苟近以昧遠兮或
不改乎此度螳螂怒臂以當車兮精衛銜石而填海惜
梁人之不思兮卒取非於異代豈方迫於尋引兮不遑
議夫無窮將姦臣取容以幸入兮公相援而欺蒙抑五
材因壯之有數兮特假手於憧憧系曰敦阜寇冥大川
屯精氣扶輿變乾文運徒力頓漂無根潮波復故彌億
年

河堤賦

唐 呂令則

水以潤物飛梁載舟居信順動法謙處柔朝滄溟以委
輸習坎德以安流善利為水涵育乎萬族極深不測灌
注乎九州壅之則有備無患決之則致敗為憂先設其
防以遏奔潦興版築護衢道惟精惟一 是經是造其奮
鉞也齊叫以雷震其揮插也連刃以霜皓蠡長堤其若
雲爰脩岸其如島何固護之克壯息奔突以永保既夾
植於菱蓮又黃緣於萍藻雖興役賦而一勞永固牛馬

由其望辨樓船可以逕度清深鏡澈時升曳尾之龜左
右人稀每帶銜魚之鷺行旅於是乎無虞耕耘於是乎
如措夫水可以為人之利堤可以防水之溢堤修則中
國無憂水敗則下人多恤亦由人之為政政成人之逸
政或不成姦詐以出則河堤之義取類非一可以合人
之安危可以喻政之得失凡百在位慎乃終吉別有沉
淪戒忤飄颻衢術幸登涉於河堤冀霑濡於瑣質

沙堤賦

以隱以金椎樹
之青槐為韻

唐

韋肇

遵大路乎新謀倚善人之廣運沙之積也得禦濕之宜
堤乃名焉審用功之分爰謀爰度是築是隱使夫晴靡
磽确之煩雨無塗潦之害若然者施之城闕豈但三條
之通用之郊垌可以千里而近伊功足紀斯美奚擬臺
或虧簣我終始兮無然山不讓塵我包含兮亦爾應物
兮寧倦安卑兮詎恥俾時行各得其所由故日用不知
其所以君勿謂泥滓之賤君其乘弘益之深高而不危
仰諸侯之殊化直而能正定志士之夙心何止禦浸淫

而為岸或當披隕陲而揀金其處也周帝城之內徒有
羨於瑤池其堅也雖衆人之力固自得於金椎亦由道
存而命舛天縱而非師是以遽奔衝應馳驚洞萬戶兮
旁啓紛九門兮爭赴往來相接見軒蓋之成陰蹊逕自
開何桃李之足樹役無妨時利莫尚茲豈衢於踰且以
夫大為防也能保其固匪同中聚而兩之仰對高闕兮
熒熒夾植喬木兮青青無偏無頗庶託情於王道不騫
不圯長委質於地靈願得乘御輦蔭宮槐敢邀功於捷

徑期展效於微埃徒以為臨曲沼登高臺誠不如賦沙堤之盛觀足以騁作賦之才

良干竭賦

有序

宋
吳儆

紹興二十有七年秋八月詔以樞密院檢詳潘公剌新安公至問民所疾苦與利所宜興者會有以良干竭久廢請復之公為庀司鳩徒授以規畫閱三月竭成先是附城之東平原延袤數十里民障溪引水溉以為田收至畝一鍾兼并家遽富溢至有以米藉地為夸侈者未

幾場以震圯積五十年莫能復復之輒震由是城東之
田多荒民多流亡存者兼重賦病之久矣至是興復如
初而天變亦息歲大稔民益德公以為非公之誠有相
之者莫能興是役也幕府從事屬邑之吏相與作為歌
詩記序贊頌論述甚備公既以言去而民益思之延陵
吳某曰是可賦也其辭曰

道新安而東駕遡連山以北馳忽原田之晻霭被禾黍
之離離紛茂實之垂黃穉綠蔚其涵滋軾吾車以延望

渺雲委而風披，遵蘭皋之決瀋。兮驚長虹之委蛇，引鄭
白之駛流。兮決龍首之勇波，放平野以四溢。兮勢同挽
夫，天河伊洪源之所自。兮浩漫漫之平川，屹中流之底
柱。兮擁萬馬以莫前，捷木囊石山積而阜亘。兮偉橫海
之鯨鱣，醜餘波以殺怒。兮駭濤江其上，奔飛流濺沫騰
蹕噴薄洄洑而鯢旋。兮沸匡廬之瀑泉，積翕淪於上流
兮。餘委漫其稽天，鬱蒼蒼之一色。兮蹇心惕而神寒，粵
有老漁飛桂楫，濯清輝登舟楫。客顧而言曰：客亦知夫

此坡之興廢乎自陂之西達於東城平臯衍其如席錯
隴畝之縱橫渠陂水以灌之率一畝而一鍾彼豪右之
肆貪兮連阡陌以為雄席羨溢之餘貲兮委而履之地
也肆皇天之霆怒兮涸其富之源也惟絕流之巨障兮
勢盤石之固也何一夕之雷雨兮曾毫釐之不遺積五
十年莫能復兮或復焉輒震之惟茫茫之沃野兮昔秔
稌之所宜藜莠莽其亡際兮叢薄蔓其相依賦名空存
田榛榛其既蕪兮縱鞭撻焉奚為幸使君之褰帷兮哀

此民之無祜乃訪故老乃命官吏乃涖乃度乃經乃理
糗糧畚鍤土石材葦儲之既具取之有所然後集農工
而授之若靈臺之始附計者度者畫者指者負者運者
餉者帥者或引或啓或窒或決或培或鑿或築或增謹
趨今如雲鑿鼓兮弗勝考龍火兮戒事閱三月而告成
凡水積兮成淵渠決兮如雨浩原委之無窮極陸海之
饒富皆使君之膏澤也今將尸而祝之社而稷之不足
以為公之報冶金伐石垂耀無極不足以慰民之思伊

君門之九重兮儼虎豹之鬚眉孰列誠而上控兮無遽
奪乎馮依若是者其可乎客曰吾聞君子之於民也施
之而不期其報利之而不居其成矧爾使君國之股肱
將利澤乎四海豈下邑之能淹也哉漁者俛而不言仰
而長吁鼓枻而去

石淙賦

明

李東陽

聳山骨兮峭嶸中潺湲兮水聲初濺涓以汨滴忽砰湃
兮鏗鐻或在遠以疑近恒自昏而徹明感天機於一觸

衆籟為之不鳴信江南之絕境乃萬類之至精彼瀑布
今可擬曷蹄涔之足稱爰有三南居士比象引義取石
淙以為名客從湖南而過者曰此非洞庭之波乎碧浪
千頃青山一螺揖靈秀於衡嶽激清風於汨羅昔予之
既排既屏來遊而來歌興懷於某水之丘寄跡於北山
之阿校風景於毫芒繁孰寡而孰多居士不答如茲淙
何又有自滇南而來者曰此非昆明之漪乎平地仰噴
從天下垂建長江而直瀉指瀚海而同歸昔子之乃祖

乃父生斯聚斯脩星移而地改方挹彼而注茲訝江山
之不可復識抑疇是而疇非居士乃憮然而歎曰嘻有
是哉吾固知石之為石淙之為淙也吾方手拊鏜鞳耳
聞春撞應噫氣於大塊引希音於清商挾涼飈以助爽
與皓魄而爭光達大觀於無外諒至美之難雙蓋將濯
纓乎萬里之流振袂乎千仞之崗若乃東山在吳以象
舊邦東坡在黃遂名四方彼二東者之偉蹟豈三南之
敢望且夫石者吾知其為堅淙者吾知其為激匪徒觀

物以適懷抑亦將身而比德蓋將礪我粗鈍蠲我宿癖
滌塵垢於七情漱芳華於六籍嗟人生之有涯見道體
之無息彼羣分而類聚何物非分太極殆不知石之為
淙淙之為石也於是二客攜酒與琴遊於淙上斑荆雜
至林歌迭唱北南俱失賓主皆忘慨聚散之殊塗顧行
藏之異尚三人者各適其適渺不知其所向也

井賦

晉 郭璞

益作井龍登天鑿后土洞黃泉潛源薦臻滴滴涓涓幽

溟圓渟濔洞深玄爾乃冠玉檻甃鱗錯鼓輓轡揮勁索
飛輕裾之繽紛手爭驚而互搦長螺委蛇以層縈兮瑤
甕龍騰而灑激乃回澄以靜映狀炯然而鏡灼挹之不
損停之不溢莫察其源動而愈出信潤下而德施壯邑
移以不改獨星陳於丘墟兮越百代而猶在守虛靜以
玄澹兮不東流而注海氣霧集以杳冥兮聲雷駭而滿
泮

井賦

晉
孫楚

倚崇丘以鑿井兮臨斥澤之淫洿若行潦之滓濁兮靡
清流以自娛乃喟然而有感兮率鄰左之數夫服厥土
以清泉兮登甘醴於玄虛體象圓川下貫五仞幽泉騰
涌津澤傍潤抱甕而汲不設機引絕彼淫飾安此樸慎
俗尚其華我篤其信既處涅而不緇又磨之而不磷雖
矢志而無妄實游心於大順渴人來翔行旅是賴輟耕
息肩不期而會沈黃李浮朱柰雜狸首之斑如飛清塵
以洮汰枕玄石以盥漱喜遨怡以緩帶

井賦

晉
江 道

穿重壤之十仞兮構玉甃之百節營之不日既汲既漂
潛流昭昭寒泉冽冽挹之不損瀉之不充納而不處其
有與而不匱其豐先王借象以辨義君子擬澹以自綏
神龍來蟠以育鱗列仙一漱而雲飛

井賦

唐
呂令則

體羣物以舉要多井功之大成灑元氣之洪液翕泉源
之至精與下坎上創庖羲之畫象鑄壤畚土喜伯益之

初營澹其味澄其清同不變以育德履剛中而益平汪
濺津潤兮物得其利沃盥盥漱兮人賴其生是以養而
不窮則取之而愈出止而有分即舍之而不盈故啓幽
人之三徑首先王之五行若乃寒漿是汲美人至止玉
甃駢固銀牀沓起輓轡宛轉以旋目素綆逶迤而度趾
羅袖互引扇皓腕而生香金餅數泉曲纖腰而貯水雖
騰突於溜源不混淆於泥滓汜至而縞瀉已就猶尚潛
聲而駭耳濯之既潔漱之則美何自下而汲上與溪壑

而殊旨故其旁搜詭迹遐評殊見土精攸出惕羶羊之
怪竒缺角已沉鬱神龍之氣變金色化粥山形溜殿源
洞德陽之兵勢匿江陵之縣秦分星聚邛都火扇漢皇
歛應於雲飛葛公一窺而電熒斯故潛怪之所蓄洩吾
不可得而言遍徒美其括坤之靈包坎之德徃來井邑
用之不忒秉虛澹而能施守卑靜以自得終勿幕之有
孚保元吉而無惑苟在時而不泥庶當潔而見食

井賦

唐
高無際

若夫羣萌異質品物殊狀俱擾擾以祈生各營營而自
養莫不濟時為要利物為先法星文而鑿井規卦象而
開泉大舜垂功於茲日龐君著績於此年資坎德而成
潤播靈液而澄鮮潛流洞澈細影凝冽不以處幽而易
清不以居深而變潔於是雕以玉甃飾以銀牀棲永康
之瑞鳥呈魯國之羴羊持素綆以就汲引金鉞而未央
爾其紅桃春映若新妝之臨寶鏡朱李下垂疑明星之
列玉池喜丁公之得利懿嫫母之來窺至若鐵騎雷駭

劍士雲列燕山之陣欲舒疎勒之泉已竭旅客愁聚征
夫思咽應下拜而將飛表忠臣之高節此甘泉之神用
也至若冬凝溫色夏湛寒輝既不偏滋於隆重亦不減
潤於卑微飲之咸濟汲之無違輅將投而鳳沒錢始出
而鳧飛此甘泉之普施也若乃冲融表裏類彼君子鑒
之無窮挹之何已悟帝王之無力學仁者之往視徘徊
疑度思盡美矣

井賦

以清汲遇
時美為韻

唐

張

耀

原夫井之為德以不變而居貞既成形於方載亦列象
於圓清潤下之功爰修之於六府習坎之義則配之於
五行惟斯井之肇作實伯益之所營爾乃玉甃爰起銀
牀斯立窺尋丈之惟深覘清泉之始及青梧下映泛桂
葉以搖揚素綆高懸弄銀餅之出入光洞徹而綠止影
飛翻而為汲且其盥之取新潔之去故體清通之惟審
知應物而無忤居上善而且平挹清規而可遇庶乎鸞
鏡熒煌而可比鳳池皎潔而為喻別有前臨紫殿俯映

丹墀上棟下宇繡栢文楣意者豈非至尊尚恬澹而取
諸動善時而已哉懿夫粉署清華飛禽載止對仙郎之
章奏近尚書之劍履竊自羞嫫母之陋姿鑒清瀾之眩
美

浪井賦

以王者清淨
則出為韻

唐王起

洌彼寒井契於聖王不因鑿以成質每自浪而呈祥涌
呀呶鼓靈長比醴泉之自出異海水之不揚吾君是時
清八區肅諸夏寶出於地符呈於野伊井有浪焉乃瑞

之大者爾其呀豁百尋之表洶涌重泉之下狀靈濤之
潛洩匪冽風之是假淪漣不盈觸搏恒驚窺坎窞之底
有江湖之情積而有潤於下混而不傷其清窺則澄澄
乍玉甃之同色汲之浩浩激銀餅而有聲鮒飛鱗而不
定羊在缶而皆傾洎夫列宿參差曉月韜映搖珠彩而
增潔涌金波而轉淨湯湯下激不施屏翳之功洶洶潛
驚詎假陽春之詠然後駭四海之目垂兆人之慶伊厚
地之發祥實大君之作聖彼青桐素綆之飾玉檻銀牀

之盛皆人力之所成固神造之不競宜乎光瑞典苞坎
德不藏於冰不蓄於墨惟波獨涌惟渫可食奉我皇之
飲俾上善以為心戒我皇之窺必臨深以取則知井非
浪不貴乎成質浪非井不彰乎聖日比井而王化其清
比浪而王心不溢稽休明而合應將汲引而無失彼堯
人鑿而飲漢將拜而出未足以彰其帝功而較其靈術
者也

義井賦

有序

唐呂令則

鑿地生泉之為井施人不倦之為義兼濟往來存乎惠也置當衢路仰無私也皎鏡清虛尚其潔也三德既備萬物是仰井乃無心義惟我謀當衢鑿井稱物並施酌而不竭奉衢樽之化焉見義不為恥也遇善莫書過也義既行矣文在茲乎賦曰

夫地脈伏泉天文垂井式觀象而遂鑿雖暫勞而功永深不過於數仞用有要乎萬頃風動無波物對生影勁陰殺節挹之而彌溫炎旱蒸天探之而愈冷況地接一

都之會邑居狹俗之境川流雨驟車馬於焉往來風舉
雲搖帝王由茲行幸魏主罷指梅之策隰朋息尋蟻之
請豈非人有其願地不藏靈色湛湛以天碧嵌陰陰而
晝冥高風始秋泛落桐之一葉太陽既沒映長天之數
星因注水而暫益縱改邑而常寧素綆下懸映垂冰之
晶晶銅餅上汲滴淺溜之泠泠清泉既汲白日可見豈
獨兼濟行李抑亦取給茲縣隨所求而皆足豈有殊於
貴賤若乃連巖之曲閨閣之前雨苔環合生其上露桃

翁鬱植其邊殊季氏之有在異疎勒之無泉入夜雲開
涵長河之短直向晨霧歇映大天之小圓玉甃護崩誰
識下無禽矣銀牀防墜不聞中有人焉乃有王國征人
奔星驛騎或注情於故櫪或銜悲於遠寄飲之則長鳴
而忘其苦辛酌之則充量而欣其普施雖一勺之蓋先
亦懷恩而感義餅之罄矣既虛來而實歸爾牛來思亦
滿腹而受賜故知理邑者賢濟人者并揚聖人之道用
而不竭守君子之德澄而彌靜鑿飲忘帝王之力汲用

嘉仁明之境儻見惻於莫食庶微功之得省

枯井賦

唐 闕 名

粵若天生五材兮一不可棄水包六府兮萬人攸利汙
樽杯飲兮變其淳朴鑿井汲泉兮興其繪事六十四卦
兮表其名二十八宿兮列其位伯益創而功立重華浚
而德備故有神丘玉檻仙苑銀牀浪花浮潤醴泉味芳
永康則金精化鳥曲阜則土怪成羊感至誠於漢將通
瑞氣於吳王若乃懸緇下垂抽竝上出窮百尺之幽秘

極九重之邃密由中夏而決外區自帝王而周庶匹接
壤鄰甸駢閭比室咸賴此以資生必待斯而養質隨大
小而周用任多少而取實環終始兮歷古今積歲時而
繇月日湯七載而無減堯九年而不溢一家曠兮靡寧
寸路虛而有卹運其功兮信廣收其利兮焉畢及夫欄
傾甃毀土陷泉沉滋液中耗汙泥上侵古桃顛賴兮無
色枯桐零落兮罷陰霜霰積兮空園冷荆棘攢兮荒徑
深昔時之所趨挹疇日之所窺臨皆指新而競往罕存

舊而來尋豈惟見嗤於射鮒諒亦興歎於無禽如使崩
壞重修堙泉更渌澄汰汙滓鑒觀清冽擬畫處之蓮房
除哭者之茅經近類齊人之井遠分夏后之穴若澗溪
之始注猶泛濫之初決當給養之不窮寧酌甘而先竭
辭曰有通有塞兮道之恒時用時舍兮業方弘疏而洩
兮甘潤騰壅而竭兮汙泥增彼幽涸兮如重啓濟窮渴
兮良所能

耿恭拜井賦

以感通厚地神
啓甘井為韻

唐羅讓

昔耿恭躬受斧鉞志清烟塵奮長策以討虜由至誠而感神於是堅疎勒之壁依澗水之濱據以為備期乎來賓既而匈奴奔敗而伺隙澗泉壅絕而不至雖礪乃戈矛而渴我將吏遂乃處孤城而穿井窺重泉而聞地深餘十丈曾無一勺之多職長千夫幾敗三軍之事因不見其成績憤將達於精意俄而外整衣服中懷果敢推赤心於神祇禱素液於坎窞拜未及起呌天以無辜言未及終觸地而有感閔其質若俟仁人發其蒙俄成澹

淡濯濯執熱祛除積慘明矣大漢士卒所以歸心惕爾
羣蕃君長於焉破膽乃知以精誠及物何物不覃以忠
烈靖難何難不戡自我而來且見不虛其請由中而出
孰云先竭其甘是日也飲人如醴帝教勃焉而光啓蕩
寇之功將略忽爾而玄通如突如焚既冽清而可食一
拜一起遂感涕而無窮斯乃道靡不弘虛無不有諒歸
之於感激豈間之於博厚所以貳師至境決泉脈於喬
嶺校尉臨邊發水源於胥井疲羸因之盡濟狂孽由之

遠屏則知在物無必至誠有孚如聲之響如形之影

井渫不食賦

唐闕名

有浚其井當時未知功已成於岸甃道尚失於餅壘潤
氣寧發潛源且卑此遇鑒明而足用彼將心惻以何為
蓄利雖多含清信久幸可溉於鼎鑊惜無施於綆缶塗
泥既去方應用以虛心汲引攸難希有成於假手況復
桐色無點桃陰不生思輒輸其涓滴望無發於澄泓同
美玉於斯將沽有待比嘉肴不食其味焉呈蓋由混衆

難分處幽多棄盥漱無及空知洌彼下泉顧盼可期猶
謂居之善地淵然日久望是光臨懼以名徵想貪泉尚
酌登諸薦品豈行潦獨任屬時非於疎勒惜地異於漢
陰願先竭以當仁期分甘苦俟一窺而見愛焉測淺深
噫夫穿鑿多勤鑒臨斯及佇將成於勿幕恐致變於改
邑因以纖綆可施一勺可挹實有備於烹飪之日惟夫
深知而用汲

水賦

晉
王彪之

寂閒居以遠詠託上善以寄言誠有無而大觀鑒希微
於清泉泉清恬以夷澹體居有而用玄渾無心以動寂
不凝滯於方圓湛幽邃以納汙泯虛柔以勝堅或淙浪
於無外或纖入於無間故能委輸而作四海決導而流
百川承液而生雲雨涌凝而為甘泉

水德賦

大哉乎茲水獨靈長以利貞分位象於八卦得柔謙於
五行混之不濁流之不盈蓄恬澹以凝潤含虛無而洞

清其近窺也若冰鮮與玉潔映曙空而內澈其遙視也
如雨罷而日晶澄遠氣於初晴德之深與上善而均美
讓之大居下流而不爭處地為泉源則江漢朝宗之義
立在天為霧露則陰陽燮理之功成辨涇渭於九流雖
衆不雜察蚩妍於萬象在隱皆明亦何異翹翹邦彥濟
濟朝英作我吏部為周亞卿昔掌地官其守土也能審
今來會府其應物也以精迴廣照之能比其妙識以無
偏之志喻此持衡故得自陝以東更仰知人之鑒普天

之下皆稱如準之平則有登舟未涉處輒未停遊子隴
頭嗚咽斷腸之奏知音席上傳聞盈耳之聲儻為廣由
中之德流順下之情則所謂清通之一過可以濯吾纓

水彰五色賦

以渥彩彰明必資乎水為韻

唐梁洽

善利無方莫先乎水識當潤色之際必取務滋之旨黑
黃蒼赤皆類其激物黼黻文章咸本而資始德既洽於
濟物色且叶於通理自得玄之又玄何謝美之為美於
以增曄曄於以散煌煌浴飛翬於陳寶浸社土於徐方

染氏繁而衆彩繁縟續人因而品彙咸彰博我以文不
獨專於潤下用而不竭將以効其靈長原夫被物如濡
霑顏載渥狀暮山而翠疊法朝景而霞駁遠同墨氏類
素絲之屢遷尚想蜀江嘉貝錦之斯濯飾袞衣而煥爛
成繡服之葳蕤何采章之不昧由浸潤之所資漸以化
成能令素以為絢期於敷衍孰謂涅而不緇既得色斯
舉矣亦可狎而玩之不假濯於滄浪寧同資於碧海凝
瑞霞之炫燿發慶雲之光彩寫補天之績鍊石之資必

該圖應聖之祥威鳳之儀咸在佐益丹而惟其深矣當
後素而不曰白乎流濕之光允若受采之時是須且比
成人之美實同因物有孚助其言而載隨炳其用而無
必乍成藻火之文幾變素紉之匹榮光可愛初謂出河
之符備色咸宜更入夢江之筆先王所以因而立旨喻
以相成含章而其輝未著發澤而其道彌精儻不苟於
體用庶可致於文明

止水賦

以清審洞澈
涵容為韻

唐

劉清

觀乎太古之初乾坤定列有坎方一德之大成江河四
瀆之別注仙海以環流度星橋而靡竭立體清靜舒光
朗澈觀五行以獨舉潤萬物而齊悅豈惟以善下之故
長應流行抑亦能遇坎則止以竭為平居荒野而不動
合寒虛而自清晝則煙雲亂出夜則星象羅生若乃湖
稱青草澤若雲夢淺深滌滄表裏寒洞當朱陽之夏晚
遇白露之秋仲紫關之鴻鴈飛來綠浦之蓮舟風送既
能止而利物所以歸之者衆亦有鳳凰之沼明月之潭

每澄流於庭院常不注於東南蒙僚窠之玩洽渾琴酌而相參以遊以賞如液如涵若英賢之取則類貞咸之是湛屈夫玉宇初晴風颭載寢籠碧天而似鏡展紅霞而若錦納衆影而不遺比羣情而特甚用使至人觀之而心察智者樂之而情審達士愛而欲臨高節聞而欲飲復乃養龜鶴藏魚龍怪石積明珠重虛以受物謙而克從有一人兮充賦每咨歎於澗松飾清顏而自肅希止水而今逢則知無美惡以畢鑒豈徒取乎矯容

止水賦

以清審洞澈
涵容為韻

唐王冷然

嘗聞神心保正天道害盈漏卮添而復出歆器備而還
傾豈若茲水居然可名既混之而不濁又澄之而不清
時止則止時行則行峻隄防則其源見塞開汲引則其
道能亨安波不動與物無爭如方圓之得性何寵辱之
能驚故為國者取象於止水使其政公平為身者亦同
於止水使其心至明至察可尚柔謙何稟思遠道則一
葦能抗守貧居則一瓢可飲接下流則卑以自牧鑒羣

物則寬而能審誠用之而舍之在去泰而去甚水之為德也長水之為功也衆散成雲雨畜作潭洞浮芥則傲吏措杯種瓜則幽人抱甕無朝夕之出納有飛沉之狎弄徒觀其深虛見底咫尺宜探千流並入萬象皆涵搖樹影於青岸落山光於碧潭其仁可以濟物其義可以激貪既而壅之不流蒙則未決照春物而畫屏相似映晴空而明鏡無別雨來而圓點亂生風靜而長波自滅任天時以開閉隨王澤而盈絕受涓滴而逾深處冰壺

而更澈書云視水責影能見形容視人行事能知吉凶
政煩則人擾水濁則魚喁夫子欲精神而不惑俾榮利
無繫於心胸比浮雲之於我觀止水而為容兀兮若槁
木坐忘澹兮若虛舟見逢正道未遠斯言可從儻不遺
於射鮒希有便於登龍

鑒止水賦

以澄虛納照遇
象分形為韻

唐

呂溫

水止矣靜之其徐物鑒矣久而益虛既無情於美惡又
奚議夫親疎委質由來所期乎上善同利忘筌已悟寧

患乎至清無魚若乃迴塘月皎高岸環合泥滓湛而自
沉金沙炯其不雜同道德以虛而受異川澤唯汙是納
有斐君子此焉明微氣隨浪息心與源澄端形赴影如
木從繩其表微也挂金鏡而當晝其索隱也隔玉壺而
見冰爾其色必洞澈光無滉瀟不蒸蒨鬱之氣不激潺
湲之響百丈在目千仞指掌惡每自乎中見美實非乎
外獎鑒形之始方似以身觀身得意之間乃同求象忘
象觀其下倒星漢上披煙雲守其常而性將道合居其

止而物以羣分君鑒之以平心臨下必簡臣鑒之以勵
志在邦必聞妍蚩無形兮惟人所召物我兼進兮水無
不照廉士以之洗心至人以之觀妙豈比夫流若激矢
波如建瓴不舍晝夜爭輸滄溟徒乖躁靜之理莫辨真
偽之形者哉邦家以道為止水鑒有餘裕羣形鱗集萬
景雲附濫巾竊吹者十手所指研精撫實者千載一遇
夫如是姑自攝其威儀亦何憂而何懼

鑒止水賦

以澄虛納照遇
象分形為韻

唐
張仲素

水可取鑒人能就諸將審己以徵實必含形而內虛其止也靜其清也徐方湛兮而皎鏡異汚彼而淪胥符上善之心自多弘納見無私之狀臨或躊躇資坎德之深矣諧至人之淡如當其曉日增鮮光風未度既清冷以爰止持炯戒以為喻等濫觴之猶蓄何一杯之是措諒善惡之咸觀必形影之自遇豈獨無當五色空涵衆文伊吉凶之肇起如動靜之潛分俯而窺似神交之澹泊默而察若靈化之絪縕且義叶養蒙道深觀竅洞虛無

以責有在清明而惟肖心不同也常稱厚貌之疑鑑之
精今未若重泉之照辨妍蚩而無失固潔著而為妙斯
所以田巴覽之而獨悲陸雲觀之而自笑若乃芳塘始
啓白水初澄有美人兮方覲坐曲岸而情凝毫髮已分
想沉姿而映藻清華不動見浮彩之生靈是知聲有往
而必復者謂其響答水以止而能鑒者謂之冥合方取
則於川渟孰混歸於海納此亦紀人事垂正經庶在觀
身而責影豈徒品物而流行今則萬頃方臨羣容在掌

隨方圓以見意在清通而賦象苟明鑒之不遺願飾躬
而是往

鑒止水賦

以澄虛納照遇
象分形為韻

唐
王季友

鑒於水者不在於廣大而在於澄渟奔流則崇山莫辨
靜息則纖芥必形故能任人倫之巨細隨物色之丹青
皆一鑒而洞達若三光之出冥因見底之清成照膽之
朗以無心而應物皆潔已而呈象如白日之輝輝無孤
蓬之振盪馮虛之狀信有妍而有蚩閱實之明固無偏

而無黨若乃仙井舊渫華池既瀦中無浴鳥下絕游魚
疑金鏡之湛寂若琉璃之內虛當其來見威儀之酷似
及其去無朕迹於淪胥向使潺湲不息噴薄長住將沃
日而騰虹或因山而瀑布遭駭颺之歛起值潛虬之交
驚雖有清明之本質豈能使形影之相遇是知專而靜
可以居要明而動亦不能照斯大道之指歸豈常情之
感召得懲躁之為誠知飾容之惟肖人觀於水既定而
後詳水鑒於人當止而為妙照其美也非所愛照其惡

也非所憎不分明於有位不掩映於無朋諒可移性俾
居於正直豈懷鑒貌獨貴於清澄想夫煙雨初霽泥沙
不雜明看皎練止若冰合忽形來而影見類聲往而響
答在良賢而暫窺宜陋軀之愧納今者貞清特異穎耀
前聞雖萬形之森列終一鑒而區分

觀秋水賦

唐

尹程

乘秋日之遊豫縱竒觀於長川惟秋水之清泚宗大壑
而潺湲波浩蕩而不極影澄澈而彌天波沉馬色類真

人之雲度岸迷牛影疑織女之河邊柳浸影而如卧萍
隨流而似牽鳧帶藻而聲澀魚亂流而水圓晴霞晚鋪
如漢江之濯錦夜月初上若織釣之映泉乃與斷金之
好連璧之友矜壯歲之紅顏怯衰年之白首效淡水之
密契就河濱而置酒惜素節之彫荷歎嚴風之入柳况
夫澄澹逶迤涵空寫淨符老君之上善同至人之不競
處下不辭其垢濁攻堅豈難乎流盛星光夜照如臨剖
蚌之珠菱影朝開似照盤龍之鏡爾乃長波瀕洞洪濤

泛溢晴天淨而空鮮夏雲臨而峯出照鄒忌之最貌鑒
陸雲之笑疾遂有感於莊篇託微言於拙筆

空水共澄鮮賦

唐張嘉貞

空之為象也本乎天水之為德也本乎泉上善之人方
其性真化之容愛其玄清虛而隱性含受而無偏因高
下而臨照故能共於澄鮮誠大明而盡善實和光如可
憐爾其皎潔清泚空色懸於水底分明昭曠水光積於
空上玲瓏晶液託九霄如染翠澈千里而含

碧微風共息含晴影而湛然兩日俱生弔長輝而相射
表裏如一容象難尋涵泳游鱗若迴陵而上出聯翩度
鳥疑戲沙之下沉為當物將類於迴覆為是人自惑於
闕臨竟未能縷列於疑似分別於空水玄之又玄美之
逾美



御定歷代賦彙卷二十九

欽定四庫全書

集部

御定歷代賦彙卷三十一

詳校官檢討_臣劉圻

主事銜_臣徐以坤覆勘

總校官編修_臣王燕緒

校對官中書_臣嵇承志

謄錄監生_臣陳瞻燧

欽定四庫全書

御定歷代賦彙卷三十

地理

水鏡賦

唐鄭繇

夫有名之域有象之中惟水能淨惟鏡能空水則無心而皎澈鏡則照膽而幽通遇物斯應匪我求蒙爾其決之則流盈而不闕泛金碧而色潤開玉匣而光發其清也不煜和風其鑒也不同意朗月爾乃雲收白日粉拭紅

塵拂芰葉而交映抱菱花而獨春直注千里旁通四鄰

成美惡之玄鑒

原本闕十一字

惜容輝之易晚歎功名之難續

況復影圓鳳沼聲激龍門可驚飛於神雀可搖動於靈
鯤同大道之自然合重玄之衆妙冰潭洞達石崖含耀
亦由裴楷清通王戎簡要知之類之意忘疲於屢照

水鏡賦

唐賈曾

原夫水能利物鏡以含虛泛鷁攸徃盤龍是居蘊靈長
而遠蓄懸洞鑒而藏諸其止水也體靜而舒惠風拂而

逾益明月來而不如清則徹底蒙紛濯洗朗亦難雜逢
昏可合則有分流學海挂影仙臺映冰壺而洞澈連錦
帳以徘徊是用益澄流品取鑒羣材涸魴思躍飛難自
猜挹餘波而得潤雖屢照而常開惟茲道也可允乎惟
茲務也可長守所以息僥倖之心杜讒慝之口將座銘
之不若雖撲滿而何有士或湮淪時多苦辛願濯纓而
未暇思照膽而無因空匪材而濫挹願將此以書紳

水鏡賦

唐
闕名

利濟者水含虛者鏡懷朗鑑遇物無心處下流通而不
競對清流則泛濫長游開寶匣則蟠螭孤映汾澮所及
泯衆惡而無私銓衡不遺鑒羣才而必正清洵其味堅
貞其質六氣咸用彼得於終亨五材不憊乃取其初吉
深則不竭貞能象物浮錦纜而花生映瑤臺而月出若
然者體不自有故受之於金功不自居乃推之於坎昭
昭神遇必盡其妍蚩泛泛隨流豈懷於舒慘清必見底
明恒照膽壅之則止寧有謝於屯蒙用之則行竟無情

於窺鑒臨萬象而皆見總百川而俱會隱瑞鵲於光中
泛靈槎於天外混之不濁含靜質而終潔覆之則昏用
明道而若昧功雖一致理或殊調乘桴浮海從我者豈
測其深賦蒙求微無欲者以觀其妙納晴天而兩日交
麗因紅粉而雙容俱笑既不憚於惠風亦何疲於屢照
加以向日冰靜澄流玉潔聲名未著覽鶴髮而魂驚功
業後時仰龍門而心絕幸君子之惠鑒庶流同而派別

水城賦

以有言河伯因
作水城為韻

唐
王 棨

呂公子兮誰與營魚為庶兮水為城雖處至柔之地還
深作固之情不假人徒構神功而日就寧勞版築壘素
浪以雲平帝始封之於河爵之為伯既淹有其涯涘遂
恢張於基塢因上善以中抱若崇墉之外隔赤魴掉尾
非經阿利之勞紅鯉暴鰓似困蒙恬之役豈不以還茲
淼淼象彼言言高標貝闕洞設龍門於以示神祇之化
於以昭鱗介之尊霞影晴臨四面之旌旗火烈湍聲霧
急一樓之鼙鼓雷喧彼則險阻可依此則靈長是託周

圍而一帶斯繞控引而百川皆作曉遇撇波之子稍類
登陴夜聞鼓柝之音終疑擊柝莫不外羅蜃蛤中集鼃
鼃蕩蕩而欲吞江漢沉沉而自恃山河似慮交侵益廣
容刀之所如虞勁敵長流急箭之波乃與川后為鄰陽
侯共守奚蛟室之能匹信龍宮而是偶沙流聚沫豈粉
堞之云無岸轉盤渦實湯池而自有況乎左負滄海前
臨孟津樂毅將攻而莫可魯連欲下以無因測彼淺深
豈有不沉之板司其啓閉誰為堅守之人偉夫勢壓重

泉功齊百雉咽喉苟有於九曲襟帶詎雄乎千里雖則都於坎據於水吾唐之聖君四郊清矣

水聲賦

有序

明陸深

陸子北征困於道路日不數里而牖隸局啓數更告勞獻瘁蓄洩稍愆則舟膠於沙夜宿河次聞河水努牖而過者淙淙汨汨卧不成寐乃秉燭倚舷聽而賦之

轟轟乎蟄雷搏地軸與匄匄乎將颶風撼而底柱折與喧喧乎龍嘯雲與哮哮乎長鯨之吼日與逢逢乎周庭

鼙鼓何桴之不絕也
呖呖乎蕭寺鳬鐘而筵又無節也
闕闕乎共公之首觝觸天柱與隱隱乎穆王之駿複道
馳掣與鏐鏐乎長平機發金革偕糜與烘烘乎咸陽火
縱而玉石裂與南薰和兮調陽泰山頽兮響長洞庭奏
兮未闕華州哭兮不傷將使裒姬輕裂帛巫山聽襄王
胡騎解重圍而鍾生改聽乎宮商也陸子寤驚惕若心
兵靜言審之胡為乎鳴舟人告予是曰水聲

廂賦

明
謝肇淛

有物於此木舌金口枕石漱流竹夾權輔兩兩相承自
為脣齒譬彼卦畫自下而起爰咫尺而丈尋亦可閉而
可啓門無鑰而卧扉墉日析而不圯梯何為乎地中倉
何為乎水底屹乎其節也砥中流而不變鎮乎其密也
涵涓滴而無滲廓乎其容也匯萬壑而委蛇沛乎其達
也建瓴走坂而不知其所之汨汨乎其不與波上下也
湛乎其滿而不盈厚積而能舍也爾其淮泗之北漳洺
以南襟帶千里疎比相參量曠校潦紆棘儲緩瀉洪濤

之澎湃導升斗之潺湲舳舨邪許以鱗次稊稻灌輸而
尾銜牛車罷載璧馬罔沉實吭喉焉攸搯詎蕭葦之可
任帝曰懋哉錫之官士惟時節宣以代爾勸斯江南之
所未有宋元之所創置榜人告予是牖而已

浮漚賦

晉
左九嬪

覽庶類之肇化何浮漚之獨靈稟陰精以運景因落雨
而結形不係根於獨立故假物以資生體珠光之皎皎
若凝霜之初成色鮮熠以熒熒似融露之將渟亡不長

消存不久寄其成不欲難其敗亦以易也

浮漚賦

唐崔根

仰參造化之理俯察宇宙之功既希微而不測亦要妙而無窮至如殷雷發谷激電流空石燕飛而迎雨銅鳥振而驚風已而懸溜不止空庭積水對霧霓而歷覽見浮漚之邈迤瑩映澄澈內明外美倏往忽來乍滅乍起含卷舒之度得行藏之軌其柔也則隨波以為心其剛也乃觸物而忘已諒潛運之恍惚孰能察其終始浮漚

之義大矣哉俯而觀之錯落煌煌若明珠之出合浦逶
而望之的皪旁羅若衆星之列長河爾其因水發色以
空成相懷清潤之秀氣負圓通之雅量信天澤以成姿
豈人圖而為狀且夫勢有萬端形無定質或繁小而爭
涌或希大而間出從下流而守謙託上善而非溢冀輝
彩於當年故韜光於晴日

浮漚賦

唐

楊炯

在霖霖之可翫唯浮漚而已矣况曲澗兮增波復坳塘

今漲水雷滴瀝兮行注階潺湲而浪起寸步百川咫尺
千里於是乍明乍滅時行時止排雨足而分規擘波心
而對峙輕盈徘徊容與庭隈狀若初蓮出浦映晴波而
未開又似繁星落曙耿斜漢而將迴合散消息安有常
則候來忽往不可為象雨密稠生風牽亂上若乃空濛
采褰浩汗浮天流平舊沼派溢新泉分容對出吐映均
鮮觸流萍而欲散礙浮芥而還連光陵虛而半動影倒
水而分圓始參差而別趣終宛轉以同沿歷亂跼蹐漂

沸縈紆細而察之若美人臨鏡開寶靨大而望也若馮夷剖蚌列明珠逐風波而澹泊乃變化而須臾迹均顯晦妙合虛無同至人之體道亦隨時而不拘夫其得坻則止乘風則逝處上下而無窮任推移而不繫似君子之從容常卷舒而不滯故其在陽則隱在陰則出泄泄悠悠匪徐匪疾因自然以見體託行潦以凝質類達人之修身故不欺於暗室蕩薄畎澮鼓舞洲渚其生兮若浮其居兮若旅雲消雨霽寂無處所唯斯物之靡依獨

含情而應機暫假有而示潔終淪空而匿暉苟無心以
自累夫何適而有違

浮漚賦

唐 鄭太昊

粵若雲橫於斗月離於畢石燕初化泥牛未失重陰潤
礎看澍雨而交飛行潦侵階見浮漚之亂出爾其合散
無常漂蕩自然形色虛潔表裏澄鮮似珠胎之出漢若
星象之浮川拂還風而獨轉偶倒影而雙圓夫其仁也
不輕鼃黽之穴夫其勇也不怯蛟龍之泉觸奔槎而遽

碎近浮藻而還連觀夫遶砌潢汙迴塘綠水長簷連屬
通溝表裏排亂滴而攢生逼湫流而細起乘川則逝遇
坎則止雖有近於泥沙信無累於囂滓既生既滅如幻
如夢體象明媚上下冲融徘徊未息展轉何窮識盈虛
之不定知造化之皆空則知生也若浮榮兮如寄秉陰
守不競之德就下表撝謙之義清虛自若有高尚之風
隱顯無恒有行藏之智別有縉紳公子思浮思沉乘時
趨勢佩玉鏘金見浮漚之形象息狙詐之機心況乎失

路書生懷憤胷臆規術恬靜節行孤直覺萬化之俄頃
知千齡之瞬息能不操紙殫毫叙浮漚之德

潢汙賦

有序

唐錢起

潢汙水之微也汲引之際人皆舍諸唯有德者知之薦
鬼神以昭忠信則百川雖廣莫逮其用焉喻士先沉後
伸於知己也辭云

潢汙之水天實降之雲散雨絕淵然在茲胡稟柔而成
性能處下以任時善乎濁而徐清貯之將綠棄捐池沼

之外隱翳林皋之曲接九派而何勞方一勺之自足至
若雲霄地表霞開水陰乾天可鑒物象是臨山曉映而
色近雲高淨而影深險阻不行芥舟寧覆盈滿知節鴻
毛匪沉產蘋繁同南澗之有藻聚飛動異舊井之無禽
斯其善利也乃至人之用心且夫出山者泉歸海者川
汲引無絕隄防在焉彼苞蕭屢浸束楚不傳唯潢汙也
獨此晏然其明若昧其壅若退竭而自中盈不侵外天
資其潔德維貫神明人棄爾微道不行畎澮夫事有小

而可廣運有塞而必通當休明之聖代徵洄酌之古風
彼湛然以虛淨盍薦之於王公俾爾忠信昭明有融俾
爾嘗祀景福延洪斯則椒漿與桂酒可以比美而同功

尺波賦

以水澹幽色風
初起波為韻

唐錢起

激灩駭水齋淪始波引分寸之餘風從一勺激尋常之
內無爽盈科勢將全涌迹異盤渦蹙跬步以無數蕩分
陰而自多觀其日色遙臨風生未已圓規可驗疑沉璧
之舊痕前後相侔若浮書而競起跡疊相近萍縈有餘

促漣漪之散漫擁跳沫以虛徐流派中移類蠖影求伸
之際浮光上透若雪華呈瑞之初湧以回回馳乎澹澹
始羣分而下瀨將積少以習坎生而有準動必若浮如
投石以花散等覆杯而迹幽影不過於布指光遽溢乎
寸眸洵洵安翔似欲將乎斗注汩汩增繞如潛運以環
周無驚川后未發陽侯當澹以成之寧同瀑怒謂小為
貴也爰進涓流淺漾風光輕蟠水力寸長所及知文在
其中方折是為見動不過則散或徃之浮彩轉初盈之

淨色將潛甯戚之鯉半未能容若流張協之薪重而纔
得汾濕若冲溶滴相通未合流於油岸方鼎沸於汾風
礪石愈戲淪池不融是將寬其泓量誠有重於泉蒙濩
也如委淪然可視茲延袤以上騰匪徒旋於中沚翠潏
交映璿源共紀將不退於大成固在乎有便於風水

溺賦

唐楊夔

玄微先生澹慮澄情棲倚岳陽湖觀洞庭渺漫兮若與
乎天平遠指君山一螺黛清遙覘湘浦一片雲明輕楫

巨舸載縱載橫或楚歌以應櫂或漁唱以齊征雖云吳
楚之闊於焉瞬息之程俄而濃雲興猛吹作訇訇兮雷
霆零零兮雨電波勢兮奔騰波聲兮濟灑或若積雪或
若裂壑樓岌業兮地如落欹檣側帆倏出歟入煙馳霧
驟神號鬼泣忽翼舉忽蟲蟄波而解浪而傾者亦一瞬
而俱及雨既霽風亦止呀呷餘波振蕩未已俄有呈其
板而流者碎其篷而飄者彼緘滕之篋扁鐫之櫃委翳
波間罔知所秘或一竹以脫命或舉族而咸墜沿汀遶

濱零落在地玄微子指而泣曰其嗜利則孟子所以惡
交爭也其欲速則仲尼所以悲不達也孰有輕命若糞
重賄如山用一縷無繼之力涉萬仞不測之川踐險冒
危既蔑履冰之誠殞身覆族空銜沒齒之冤弘農子聞
其言同其嘆此則以江以湖沒不可援今復有非波非
濤溺不可算窺之則茫然無岸由古及今陷者如貫玄
微子矍然其詞泣然其悲何陸之為溺而不維不持紛
吾緒而亂吾曲爾其辨而析之乃曰麴蘖是惑沉緬無

時混淆先後顛倒矩規唯誕是習莫禮是持散髮裸體
以邀以嬉汨親疎凡尊卑情所至則至意所為則為可
慶者忽其慶可悲者忘其悲龍章莫保鳳德何衰光逸
則獨實求入伯有則壑谷忘歸子反不謀於軍前敗非
天作正平不拘於席上禍乃自貽但驕其氣益亂其機
隋兵濟江玉樹方舞越人入戶金甌猶飛所以為酒之
溺也至若貝含其齒雲聳其鬋苞藏其戾矜持其妍攻
巧若拙移曲成端為媚斯極荷寵益堅陳靈以相服戲

朝俾君臣受辱驪姬以歸胙獻毒使父子成寃齊莊以盜室取斃邾驪以奪儷不全此所以為色之溺也至若伊義莫顧唯賄是務以譎以回不軌不度溝壑難滿錐刀必聚莫興知足之慙蔑有惡盈之懼其帑溢其帛蠹其貫朽其粟腐營營尚恐其力窮汲汲不思其日暮復有白版為侯黃金作輔南宮變屠賈之行西園成闕闕之路求金求劍曾無就木之心鬻爵鬻官但欲齊天之富士夫死而方覺雍子戮而未悟此所以為貪之溺也

至若專國之柄操天之軸任其情性隨其嗜欲其喜也
沉者浮其怒也贏者縮易否為臧化直為曲雖山重而
可迴雖海深而可覆其門若市其帑如谷背者斥向者
錄言張其機笑孚其毒譽之則銖而為鈞訾之則歌而
為哭屏內外之氣側天下之目稽其莽卓考其產祿謂
兵鈐之在已將神器之有屬國璽行竊弄之手宮闈開
盜視之目自謂其投蓋之力可圖殊不知燎原之火難
撲既衆叛而親離竟噬臍而齧腹此所以為權之溺也

是四者匪橫其流匪駕其舟有溺者孰究其由其毒也
必漬於骨髓其痛也亦甚於戈矛雖扛鼎之力觸山之
酋亦不能杼之以出而況於纖離之儔哉玄微子乃曰
始吾觀涉水而溺則怵然而內惕今復聞不波而沉則
瞿然如大敵且酒不可甘甘之則沉吾命酒曰甘波色
不可愛愛之則溺吾命色曰愛河衣所以被體食所以
充腸苟朝晡而不匱寒暑而有裝豈假積粟於廩儲貨
於囊且藥所以攻百疾百疾竭而藥不止者鮮不及其

殃吾命財曰藥江士患不達之名不立之身苟達苟立
在守其真何必競升沉之路爭輕重之鈞狼子野心睚
之害人吾命權曰狼津噫生於世不溺於四水者吾謂
夫顏閔之倫

冰賦

唐
陸 環

大哉洪鈞賦象觸類而生或分氣四序配位五行惟彼
冰之堅質包履霜之漸成夫其體含上善色侔晴雪妍
蚩自明表裏虛澈原其物也則昏危應位覘其時也則

玄冥御節陰氣盛陽晶滅殺氣鴻洞嚴飈栗烈當此時
也何水不凝何潭不結瞻山則萬壑俱閉歸海則百川
潛泄諒造化之自然羌難得而備說佳其空冷愈堅風
淒益壯汗漫稜層委積亭障交河則戰士加守合浦則
漁人迷望况乎天道無私所應多姿雲禽下覆彰后稷
之聖德泉魚出躍表王祥之孝思然而題周官順時令
皎皎雪聚皚皚山淨盤重澗而疑壁瀉圓池而若鏡與
海鏡而混輝將玉壺而相映何層冰戕戕形埋奔浪勢

壓衝波坎位臨時則慎於馬窟離光再設示合於滄沱
豈直若斯而已哉固見美於將來其藏之也黑牡秬黍
以享侯其出之也桃弧棘矢以除災取順則人不天札
周逆則時多震雷故以北陸而收西陸將啟冬鑒秋刷
識寒暑之情大槃夷槃表君臣之禮徒觀其謙也每避
燥而就濕其讓也亦背陽而向陰偉何點之入喻著幽
詩而見欽皎爾自安同達人之守節渙乎將解若天道
之無心故先賢取危於履薄作戒於臨深或曰衆雖類

而多名曷方茲而至妙明陰陽之本為適時之要可以
羞之於王公可以薦之於宗廟儻水鏡之一察猶希暫
於迴照重曰深山窮谷凌人鑒頒賜從來天下聞別有
川池捐棄者終思采斲獻明君

冰賦

唐
劉長卿

水無心而清冰虛已而明始則同體終然異名水之動
我變以靜水之柔我變以貞任方圓而能處其順在高
下而不失其平北陸初凝結而為冰東方始起融而為

水與時消息隨物行止水也不知其所然冰也不知其所以何推運而有恒乃忘情而合理觀乎外示貞堅内含虛澈無受染以保其素無納汙以全其潔比玉而白不為蠅玷比月而明不為蟾缺瓊樹色奪瑤池光發變寒日之清瑩帶陰天之肅殺爰自止水遍於山川山穴俱閉長波寂然皎皎彌靜峨峨遠連如雲覆地若雲披天雲之凝兮佇長風而可埽雪之積兮向太陽而可全豈同夫氣之所感物莫能遷勁飈夕寒我力增壯晴景

朝暖我心猶堅其堅伊何履霜所至其薄伊何臨泉是
畏君子用之以馴致其道覩之而不驕於貴二之日始
鑿命虞官三之日始納享司寒天子陳禮容賦豳風大
啓冰室獻於王宮氣肅雲陞寒生袞龍闢九門於月下
列千官於鏡中頒衆位取飲以受命御至尊得象於朝
宗若君莫之求臣莫之見則深山窮谷詎可得而加薦
苟藏之不周用而不徧則災霜害電如有待而為變人
或愛我清人或愛我淨既潔其跡亦堅其性水之冰生

於寒人之冰生於正無棄其道吾將何病

冰賦

唐
韋應物

夏六月白日當午火雲四至金石灼爍玄泉潛沸雖深
居廣廈珍簟輕箴而亦鬱鬱燠燠不能和平其氣陳王
於是登別館散幽情招親友以高會尊仲宣為客卿睹
頒冰之適至喜煩暑之暫清王乃誇賓而歌曰含皎皎
兮瓊玉姿氣淒淒兮奪天時飲之瑩骨兮何所思可進
於賓請客卿為寡人美而賦之客諾曰美則美矣而大

王不識其短夫謂之瓊玉竊名器也氣奪天時干陰陽也內熱飲之媒其疾也寵一物而三失德且出寒谷而至下薦宗廟而至高僕竊感之而歔歔安得不為之而抽毫何積陰之勝純陽兮惟此玄冰居炎天之赫赫兮獨嚴厲乎稜稜其始也月玄冥日北陸天地閉水泉縮動靜一變剛柔反覆壯以烈風積如羣玉由是依廣澶漫馮高崢嶸大寒御節萬動潛形浮彩浩浩仰吞素靈羣山早曙陰壑夜明古者祭之黑牡其藏以節被之桃

弧其出以潔今明明大魏禮物必備實大王樽俎之常
品非小民造次之所致若尊卑異等頒命有度碎似墜
瓊方如截璐况粉壁雲螭象筵霜布座有麗人皎然俱
素雖衆賓之同輝諒為物之難固其竊名假質以謬一
時之賞也如此若乃對脩竹臨方塘俾炎作寒兮反我
天常嗟絺綌之失御於三服兮亦紈扇委篋而內傷其
嚴沍之威以干陰陽之候也如此若皎潔的皪與時消
釋或沉珠於杯或化璞於液王將甘飲聊以自適豈知

乎一寒一溫日夜相激久之以生疾今內外不和而怵
惕其翫意而媒疾也如此觀其力足以淒一室利庖厨
俾甘肥晚敗醇釀不渝非可調膳理安營魄奈何以誇
客陳王於是皭然而慙曰寡人生於深宮懜於服食左
右唯燕姬趙女侈服美色微客卿之言則何以雪余惑
方當命有司而撤冰書盤盂以自式

水始冰賦

以律報司寒冰
固水結為韻

唐
陸環

潤下之性有時可凝暑歸寒集陽閉陰升吹寒風之遠

派威凍雨而成冰俾巨海以息浪胡涓波之足徵北陸
陰涸寒泉井冽天昊外搏靈胥自潔含貞抱虛既瑩且
澈斷流而稜稜劍威照日而片片霜切馭坳曲陵湫穴
蒼山甕石大冶流鐵圓光而蚌珠可掬朝涉而馬蹄可
折既否隔於風雲亦閑藏於魚鼈爾乃命海若戒馮夷
連燄絕於火井俾梁成於水湄乘險無替旬日不衰若
擁輕絮如積素絲秋令雖終尚占庚辛之色嚴風更肅
將奉玄冥之司其為水也則陷其為冰也則履畜成比

王之壺散作流謙之水柔性是著仙顏是比方稽化而轉疑蓋不知其所以夫其瀑布流湍迸射交攢簷溜承綆垂空凍乾微波煙冪大壑雲漫滴貫珠而呈脆排層巖而召寒至於六尺表竒百丈涵奧鼠北方而可規蠶東夏而稟操堅貞應運度光武而堪竒孝德幽通獻賴鯉以為報始冰之初立冬之日將鑿井望納秩刷室應候司管調律溫泉殊治夏蟲異術閭闔門靜瑯琊井溢當腹堅而將藏候朝陽而乃出

冰泉賦

以應陽氣而發蒙為韻

唐陳廷章

衆潤將行一陽初勝剛柔合德遠近潛應動能依節自
契周書之言流未入淇豈若衛詩之興時也豈冰填井
甃日冷池塘暫無聲於短景終有驚於靈長於是微消
涸返稍變潛藏既聞乎下能順上豈聞乎陰不承陽深
且異於潢汙孰云咸竭用堪和於酒醴誰見必香居壅
鬱而將聽聲潺湲而尚未雖幽深之可則終遠大而為
貴未知所適願添滄海之流必得其宜無俟黃鐘之氣

激灑如彼清泠注茲其道也誠於遠矣其深也可以述
而望朱夏而龍文生定四時而不惑當玄冬而麋角解
後五日以為期暗漾懷珠之媚潛抽漱玉之姿鄙借勢
而為瀾每遇秋風之列列待流聲而解凍必由春日之
遲遲全其性以守柔相其時而忽越思玉溜之纔吐若
岷江之初發出陽岸之下潛潤澗毛涌陰溪之中輕搖
石髮決諸可見其澹淡冽彼詎同夫汨沒冀雷驚之蟄
猶若陸沉當治理之時不虞乾沒當今化源畢啓時令

皆同覩陽光之下達昭帝澤之潛通浮帶地之功暫留
坎窞運知天之德終異童蒙倘或導於外發其中冀有
裨於江漢得流善於無窮

初日照冰池賦

以鮮彩朝澈寒
光入座為韻

唐 馮宿

日生東方冰滿池塘以涸沍之寒質承亭曛之曉光其
象斯潔其容可閱炳爾昭煥朗然澄澈可愛之德已聞
左氏之經如履之心更憶詩人之說既合體而光輝且
負暄而昭晰全嗤嶺北之梅詎比牆陰之雪美其林煙

早晴寰宇淒清池有水兮冰合天無雲兮日明凝陰尚
積暖氣漸盈淋漓兮向陽和而未泮皎潔兮覩津潤之
將生所謂當此嚴景昭茲陽彩上下相融貞明共在斯
乃元化所結玄功不宰日有曜而必臨冰無心而有待
不然何大明兮方懸凝質惟堅斜景自高而來照素曜
相向而俱妍曲岸增媚平沙更鮮豈西陸之中候朝覲
而方出東海之上泮陰火之潛然是知清興攸集氛埃
不入隨陽而孤雁初飛向暖而羣鷗乍立且日者分乎

兩曜冰者生乎沍寒既清貞而可賞信溫煦之咸歡足
使勵志求鑒探幽就觀何必挹瓊漿於丹竈思夕露於
金盤曷若色映朝戶光陵曉座冰生池上豈羨玉壺之
明日下池中全遇隙駒之過聊賦之以體物庶同白雪
之難和

冰池照寒月賦

以寒淨光潔
澄心目為韻

唐林藻

瑤池洞澈兮堅冰始攢玄天皎皛兮皓月初圓冰含虛
以淒冷月委照而光寒既合體以凝質故清輝而可觀

爾其氣肅而勁色虛而淨俯視則湛若玉壺仰觀則爛
如金鏡履之者可以慎其矩步翫之者可以滌其情性
嘉乎清熒旁達瞳朧交映間樓臺則素色彌分出河漢
則清光寥曠良吏觀我以思飲墨客覽我以思詠懿夫
鑒照無隱盈積有方纖埃翳而必見衆象照而難藏晃
兮奕奕耀兮彰彰奪銀河之曉色掩水鏡之秋光於時
羣動已息寒夜未央微雲度月以澹蕩細影拂池而悠
揚晶耀兮環林之際朗練兮孤亭之旁月周天兮有虧

池擁冰兮難決月在則光瑩月沉則光滅彼冰也非無
自然之色我取映月而增潔此月也非無自然之光我
取籠冰而加澈斯乃以淨臨淨不瑩自瑩精氣交而上
浮光彩融入暝夫如是至人遇之而暢襟貪夫對之
以勵心豈徒皎皎然罔象炯炯爾照臨而已哉向若月
隱西峰冰藏深谷焉得解吾人之昏滯悅志士之心目

冰池照寒月賦

以寒淨光潔
瑩心目為韻

唐

王履貞

至矣哉玄冬之季茲池可觀臨方塘而霜容既肅照圓

月而素色兼寒凝為冰碧淨若琅玕迥而窺乍驚飛於
繞鵲俯而察寧失顧於迴鸞若乃日暮雲晴蒼然色正
水彩旁射蟾輝下映的皪兮地布明璫瞳矐兮天垂朗
鏡則雖隨侯之珠皎而潔和氏之璧光且淨曷比夫動
資文士之興載悅吾人之性觀夫寒空若畫清漏且長
透珠簾而庭戶增媚浮玉樹而園林借芳攬之則無誠
偶形於顧兔視之若有徒積素於飛霜故能潔通宵之
寒氣凝徹底之清光既而空色相鮮餘華昭晰嚴風吹

而不散互陰生而轉潔偏使閨婦增思征人愴別望隴
上之嬋娟怨池中之凜冽又能使空門禪客除昏滌冥
對之而虛白生襟觀之而神形自瑩嗟乎時之革物物
感人心俾閒放者取而適性勤苦者對以愁吟則知冰
月之宜靡極沿變之趣彌深原夫幽院添池晴峰繞竹
幾處堪賞千般寓目加以清冰素魄復何媿深山窮
谷佇月令之必賦冀同出乎西陸

冰將釋賦

以和風既至進
日初臨為韻

唐

侯喜

春入寒水冰驚淺潄照遲遲之早陽色將無定度習習
之回吹勢欲難任渙若分彩濡如在陰如應勾芒之節
將成老氏之心非其漸焉何以知仁氣之徐至不日釋
也何以表陽光之有臨稍露沙痕似分苔翠在形開而
可觀因罅發而增媚動其中矣將有日而然開必先焉
若知風之自澹引晴色洞含春意曩之能久曾殊見現
而流今則不堅轉失履霜之至當歲華之既好變水綠
之云初暗轉而光搖已薄輕流而影動惟虛觀夫宵以

汧汧晝必徐徐淨以當融稍驚北徂之鴈輕而未散猶
觀上越之魚如此則消積凍發微波西陸當出東風已
和湛兮而平劍開幽匣默然而運雲斂晴河方催皚皚
之白漸滅昭昭之多則知道貴無質我之釋兮以日不
徐不疾與真源匹政尚得中我之釋兮以風洩洩融融
與皇澤同事有可貴用非可既懼乎裂尚保質於地寧
就其流始收光於神氣潰然當解熙哉此時幸照臨之
必及豈開泮之云遲日已不寒正難於鳥覆數當有盡

轉使於蟲疑吾亦慕斯冰之不擇知所以裁之

冰泮曲池賦

以春日風暖之候為韻

唐王起

玄英變律青陽報春伊曲沼之方燠始冰泮於斯辰北
陸初凝昔我我而色閉東風忽解驚片片之光新所以
將延軒騎稍媚咸秦散亂瓊岸離披玉津開碧潭之漾
漾如白石之磷磷豈必積窮谷而與競塞長河而見倫
則知煦嫗有待互寒無必將辭烈烈之風漸映遲遲之
日或竹破而瓦裂或鏡華而玉質帶宿草而猶霑添新

泉而更溢小大惟錯方圓不一臨深之戒稍窺履薄之
危漸失蠶之績也必見其淪胥鯉或感焉匪勞於剖出
璀璨騰外淋漓積中隨波響激遵渚光融下魚竿而不
隔泛仙舟而已通渙渙初流自同夫溱水冲冲罔鑿奚
取於幽風是知冰在池而合散池與冰而虛滿腹堅難
俟於星迴磔裂必因乎風暖皎潔不私清明在茲殊玉
壺而覩止異凌人而藏之鼠無德而潛伏狐由是而決
疑和而不同始堅然而固節積而能散終渙爾以隨時

客有覽名都之秀盼迴塘之溜知迷津之可通在解凍之斯候

履春冰賦

以戒慎之心如履冰上為韻

唐陳 岵

履道有本戒之在冰每翹翹於進守如凜凜之不勝累足有懼旁行可矜識安危之在德豈顛越之或承不敬其心敢微所以本之於有既漸乎履霜戒在不虞罔輕於狎水方保心於慎獨焉敢測乎涯涘人之所畏豈造次而可忘道之將行非中人而勿履敗或聞於旋踵義

無輕於舉趾不處其薄君子之行固然若居下流詩人之戒深矣其始也陽律掩耀陰飈戒時因潤下而生德由寒沍以成姿皎若澄虛而體合上善冥然沉響而跡不能欺苟戒之而不履是以履之而不疑事異涉溱匪裳之褰也德猶如雨知行可蹈之則知視險無必素誠可諒罔違日慎之心無易春冰之上投足而衆流不測委順而中流是廣怒馬如擣知大患之在躬生也若浮敢馮虛而用壯孰曰堅乎匪同介如結寒波而暫聚湛

清質以含虛恍若有無似乘空於月宇退然如失猶奉
身於玉除且異夫莫來莫往何遵於匪疾匪徐必若懷
以勵貪飲以明信如臨之戒如履之慎則知水德可保
冰力可任匪冰不薄匪水不深彼之踏者委乎足我之
蹈者本於心又焉能料其薄厚而計於升沉則執德周
愆持危不戒意平澹之可翫在清夷之可懷豈知蹈之
有道行之在德而忽乎淪溺之敗

陽冰賦

以海上沙前光
耀清景為運

唐林滋

考庶物於朱垠得陽冰於碧海託巨浸以潛結泛驚波
而長在堅乎自得戔戔之素色寧虧渙若無虞皎皎之
清光詎改始其孕太陰之精因積水而成勁颼颼之遠
吹澄滉漾之餘清別浦宵凝狐聽之聲乍絕迴汀曉合
蟲疑之質俄生繇是外肅重溟中分萬景滄淵掩巨蚌
之魄碧落奪寒蟾之影幽疑玉樹露皓氣之皚皚淨若
銀河亘秋光之耿耿既叶數九寧將屢遷乍瑩洪濤之
末時明綠岸之前不解東風諒難資於履薄非藏北陸

復何患於攻堅炎炎之畏景雖臨冽冽之寒威益壯暘
輝想冰始之日洞澈得夏頌之狀解颺乍觸無慙於雲
母屏中纖翳不生曷愧於琉璃地上淨拂霜影輕籠月
華稟質苟因於涸沍分形詎委於泥沙既異在陰彩射
蛟人之室非同向晦光寒漁父之家至若浪息遙川烟
收遠嶠焱晶鑠野以增熾皓色澄空而引耀清含上善
曾無泮渙之期素激中流豈憚赫曦之照所謂出自靈
長居然異常苟惟貞而自守雖盛暑其何傷亦由抱素

者絕陷已之患履道者為終身之防幸消釋之無日庶
永託於朝光

藏冰賦

以堅明潔
鏡為韻

唐張皓

國之造物時惟用天履在歲之窮紀知層冰之腹堅可
以備用凌人主焉羞拒黍以為薦率司寒而是先於是
入坎窞踰崢嶸乍逼側以經險復趑趄而不征爽氣旁
達凝陰上清始戕戕而不見遽沖沖而有聲是伐是取
登乎上京候朝風而益壯對夜月而俱明崇凌既啓陰

井方渫含聲色而轉深拂霜威而逾潔不靡不剛如磋
如切掩下方以涸沍匪上騰之發泄方見象於為寒且
多驚於內熱顧惟不佞括結成性彼蓄物以備用亦何
異乎藏冰將有冒於嚴凝豈見遺於水鏡

藏冰賦

以西陸朝覲方
出之也為韻

唐
歐陽詹

晚日離斗兮昏星見奎鴻峽向北兮龍角徂西天子慮
層冰以為災闢凌陰而大納山人於其時而共職庶壽
域以同躋黑牡既馨玄冥已祝人惟在土侔有賦以歸

王物或稱琛類無脛而奔陸鑿涸泣於窮壑閉重泉乎
夏屋炯乎干將之出地燦乎連城之韞匱爾乃東風月
仲之節西陸晨覲之朝薦明靈於寢廟頌有位乎中朝
光可鑒形鄙照車之寶楚清能禦暑輕萋莆之珍堯尚
玉堂以孤瑩鎮瓊筵而自昭助微涼於長簟迴煩燠於
炎飈鬼神以之而饗集君臣以之而利饒豈止疾雷不
震淒風不飄致兩儀之交泰作六氣之和調而已哉冰
之藏也旨意可稽冰之賦焉英華可覲休宗社之成禮

暢乾坤而樹績順時元吉為我政之恒孚悖道致尤寧
魯臣之屢折六合蒼蒼萬物攘攘詎無時啓亦有時藏
繹其功而此譬於厥德而何方勁挺金相貞清玉質展
其用無愧於明時韞其光不欺於暗室平凜冽以冬入
滌赫曦而夏出穿楊發彼觀國於茲幾鬻三冬之學又
當二日之時業屬辭以比事遂含毫而賦之

開冰賦

唐王起

國家順仲春之律開藏冰之室將以均寒暑分老疾北

風始壯且納於必周西陸有期因用而斯出是時木德
司辰條風報春物惟求舊令乃謀新有頒冰之職有伐
冰之臣安得深藏於重壤自當登御於一人有司奉明
詔薦清廟啓其空觀其微連鋪既下不作沖沖之聲厚
土忽開已發戕戕之照獻羔之禮既宣祭韭之義克全
將使陰不伏陽不愆詎有東風之解莫移北陸之堅皎
潔兮玉壺乍奪清瑩兮金鏡爭鮮鑒乎其中雖臨深而
履薄積於其外終岳峙而峰連此與人之所納縣人之

所傳乃被以桃弧升於蘭殿凌陰去而寒盡御座來而
春變其為利也溥其為用也徧羣寮是錫足以表鴻恩
百祀方修足以成嘉薦向若藏之不以宜啓之不以時
自然光而不耀貞以自持同土石而棄矣何賓祭而用
之德既自此宣政亦自此審禦霜電以清沴調風雨而
成稔開五色之瑞福應方來叶七月之章頌聲曷寢豈
惟求履霜之堅思積水之凜冰之開也在於人冰之用
也進於君昔時司寒雖蒙於幽閑今將清暑終見於區

分儻不遺於茲日期不掩於前聞

冰井賦

晉庾儵

嘉陰陽之博施美天地之廣宣萬物雜而無越不易類
以相干或專陽負暑或涸陰沍寒塗雖殊而同歸信協
德而俱延於是孟冬之月羣陰畢升霜雪紛其交淪流
波結而成凌啓南牖之重隩將却熱以藏冰山人是取
縣人是承納遠宮之邃宇靜幽澹以清激抱堅精之玄
素發川靈而長凝於是寒往暑來四時代序帝將攘患

炎災是禦爾乃攜我同類援我烝徒將涉寒藪害氣是
除攀靈艦而增舉爰自託於城隅仰瞻重構俯臨陰穴
淒清驚冷感發栗烈餘寒嚴悴淒若霜雪乃命有司啓
彼潛戶寒風慘悴此焉清暑格炎靈之恣曜兮摧盛陽
之暴怒弭和春之淒風兮過溫夏之苦雨保百姓之艱
難兮俾羣生之寧處及至股肱或虧卿士殞喪寧神扇
暑肅厲清涼用處凶禮無失典常美厚德之兼愛兮乃
惠存以及亡

冰井賦

以寒井陰潤冰
以時入為韻

唐
李 冑

冰井皚兮星歲闌冰候井於春泮井含冰而晝寒其質
也惟至貞而可鑒其量也惟極深而可觀夫其碧甃熒
熒清光炯炯呀爾莫測堅爾而靜閉土膏之潛脉奪霜
空之麗景濟時方候其獻羔利物不資於短綆前王何
以貴冰而鄴臺尚開乎舊井下視千人傍窺百尋足使
貪夫勵志君子戒心或以慮危則取象於履薄或以思
險則取類於臨深豈從遠自窮谷而納於凌陰其道有

恒其迹無固當未用也雖處幽而無悶當其用也雖向
炎而不懼縱居井之未深亦在冰而守素若乃天地閉
海河凝風落木霜含冰或呈六出以表符瑞或因五行
而見咎徵寧比夫在坎窞而不耀遇陽和而自升故知
井之為德莫之可比奚若汲引於焉賓祭是以頌之也
遍出之也時雖應用而無倦終待命於有時東風可解
西陸可期不以深而見棄不以輕而見遺側玉盤而有
望仰金門而可入質惟務施固不戀於深山道貴能行

亦何慙於改邑懿夫吾王之政無不修化無不及猶慮霜電之為災故冰井所以立

冰井賦

以寒井陰涸冰
以時入為韻

唐史宏

鑿之冰井厥用可觀井因厚地而深始將乎人力冰以積陰而壯必本乎司寒所以候立春而氣至當嚴寒之律殘順乎時不愆於夏歷守其典必驗於周官若乃冽井者泉藏冰者井至陰相合表虛受之無瑕聚氣而堅叶坤柔之至靜況乎玄律涸沍寒光凝冷積風塵於四

郊封雪霜於萬嶺者哉觀其啓隈隩洞幽深矗如雪聚
皎若月臨抱堅精之素質體玄妙之精心期三凌以示
乎通用言一日方屬乎窮陰且滯其井不憊於度爰納
其冰轉增其固妍蚩必表將金鏡而分形明皎相鮮與
瓊漿而競素影淋漓而未泮質晶耀而凝沍若玉壺之
洞開似金波之始露其初也小人是承翦乎荆棘陟彼
丘陵當玄冥之用事供北陸而藏冰出窮谷而方結下
重泉而轉凝託影超象因物為比或瓊碎而星流或峰

聯而岳峙為王者之恒典俾羣生而是以穿重壤之十
仞以表藏周候朝覲而夏頒用不私已稽夫井以不變
為德冰以至堅自持并非冰而不能全其淨冰非井而
不能應其時體剛居中且異乎滌而不食力柔其重方
同乎順以致辭其功克廣其用斯給慎以祓除節其出
入異彼廬陵之瑞空存三色之名同夫甲子之祥用彰
七月之什當其舊典不廢新令是緝喜災害之無虞頌
皇王之御立

御定歷代賦彙卷三十